

# Ir sin via per dapli colurs

A l'emprim eveniment da «Pride» en il Grischun èn sa participadas questa sonda radund 1200 persunas. Ellas han demonstrà per acceptanza ed egualità da la cuminanza da LGBTQ+. L'uniun «Khur Pride» ha organisà quella manifestaziun en la chapitala grischuna.

In til tras la citad da Cuir è stà il punct da partenza ed il punct central da l'emprima «Khur Pride». Bleras persunas han purtà las colurs da l'artg Son Martin – per mussar colur a favur da la cuminanza dad LGBTQ+ e per prender uschia il pled encunter discriminaziun en dumondas da l'orientaziun e l'identità sexuala. Da la staziun è la fulla colorada chaminada tras la Poststrasse vers la citad veglia, tras la Obere Gasse enfin en il parc dal Stadtgarten.

## Cumbatter pregiudizis

Il messadi da la «Khur Pride» è stà: «Ti es bel e bun uschia sco ti es – i na dependa betg, sche ti es schvul, lesbic, transvestit u nun-binar». La «Pride» è in'occurrenza per festivar la communitad da LGBTQ+, sco era per cumbatter per vesaihladad, acceptanza ed identità da quella. Plinavant duai l'occurrenza era gidar da cumbatter pregiudizis, construir punts e commemorar a tut ils pioniers e tut las pionieras da la communitad LGBTQ+.



**Era la cussegliera naziunala Tamara Funicello (PS, Berna) ha tegnì in pled en il Stadtgarten.**

## Festa enfin en la notg

En il Stadtgarten hai dà in program cultural enfin la saira tard: musica, plects, drag-shows e stans per s'infurmar e per mangiar. Suentar las 23.00 èsi i vinavant cun la after-party en il Cuadro 22 a Cuir.



**In program multifar hai dà sonda suentermezdi en il Stadtgarten a Cuir.**

Tenor l'agentura da novitads Keystone-SDA èn sa participadas radund 1200 persunas a la manifestaziun. E la polizia da citad da Cuir ha rapportà che la manifestaziun da sonda saja stada paschaivla e ch'i n'haja dà nagins incaps. (rtr/fmr)